

## 2 KORINTIYA

### Warage Ram o Ayeedek Pól Ol o Abaak Korintiya

**1** <sup>1</sup> Aneeta Pól o eŋerawan Jooi niini doon ka kizi toonnyai ci Yesu Kiristo. Aneeta kibeem Timozi ween gótóna onai tuwenta kayeedekun warage nico igeet ol o tuwento kuture o kazi Korintiya kibeem buk ol o azooni zóó o Joowo looce o kazi Akaya dook. <sup>2</sup> Kazaayun igeet zaare o Jook ween baatina kibeem zaare o Manyi ona Yesu Kiristo.

#### Anyek Pól Jook zany

<sup>3</sup> Abon katal Jook ween baati Manyi ona Yesu Kiristo. Nónón nēen o kawucnek naaga nónón, ma aku tirten dook ŋaatin. <sup>4</sup> Atiritet niini ageet kaale o kapirane dook ka zin buk naaga kitiritit ol oogi piryakzete uneen kiyo buk góon atiritet Jooi ageet o. <sup>5</sup> Zin ma koromtozek naaga Yesu Kiristo piryakzete onin, apirane óróót, ma kapirna naaga kiyo baale niini e. Buk góon mā kapirna naaga, aromoneket niini ageet, ma atiritet piryakzete cinai o. <sup>6</sup> Mazin naaga mā kapirnana, kapirnana ka kitiritun igeet ka eeltai niiga orogit. Mā kajowana tirten, atirtenu buk niiga, ma anyaku dōyiz ci amezu piryakzet zinzeetine ci alal kiyo buk naaga o. <sup>7</sup> Kagaya zin naaga nōkō kiyo kozolit naaga kibeem igeet piryakzet o, kazol buk kibeem igeet tirten cinaañ o.

<sup>8</sup> Gótónōga o tuwento, karoŋnyun naaga igeet agaac piryakzet baal kapirnana looce o kazi Asiya e. Kapirnana waanice óróót ele zee ma alaŋ kagaya bodo karugna. <sup>9</sup> Bar kaziya ne, Coma apawozeyet daayizi. Akanai zin gi nica o ka calañ naaga katuya dōyiz ci eleeti ogaacak, bar ka kutuya Jook o anyak dōyiz o adikir, ma anim niini kitiŋawi ol daayiza. <sup>10-11</sup> Eelawet zin Jooi ageeta daayiza, ma ŋaan tiŋeere amena niini eelanet nōkō. Kagaya naaga ŋaan eelanet tiŋeere niini ageeta nōkō, giye o atiritetu niiga ageeta ŋaryiinta eelanet tiŋeere Jooi, ma amayuket ageeta, eeci azii niini gi o aŋaryin ol ci meelik. Anyek zin tiŋeere ol ci meel Jook zany giye o atiritet niini ageeta.

#### Kaal o aróon Pól kutugu

<sup>12</sup> Anyak zin gi codoi ce, ci góon kabolola naaga, ma kagaya naaga didi zinzeetine ogaacak gi nici een didi. Kabaaka góon naaga kibeem ol dook jurun zinzeetine ci abon eo aróon Jooi ricik óróót ŋaatonooŋ. Kabaaka nōkō o, eeci atiritet Jooi ageeta niini doon bonate onin, alaŋ een genyize cinaañ. <sup>13</sup> Inoko zin kayeedekun igeet kaal ci aboke ŋaati akeebju, ma agayu keŋti cigeec. Bar zin ŋaan anyak kaal oogi ci ŋaan niiga agaac. Karoŋnyun zin igeet ka agaac buk kaal niceke jurun. <sup>14</sup> Zin katin iitene ci abadaan Yesu Kiristo e, abololetu niiga ageeta jurun kiyo buk kabololun naaga igeet o.

<sup>15</sup> Zin giye o kagawe naana kaal nicoko dook, karoŋ iiten baale gól ci kakōye ŋaatonooŋ ka ojokta niiga mayuwenet lak ram. <sup>16</sup> Karoŋ waanice rak óowa kook kidiirun igeet ŋaati keerōne kakōye Masidoniya. Ma bodo vurma karoŋ ka waan kidiirawun, ma kabada ŋinaante ka enice itiritan kook Judiya. <sup>17</sup> Baale ma karoŋ ka kook kicinun e, ŋedet waanice kaada naana zinize onan dook karoŋ kook kicinun didi calañ kaŋer zóó kiyo góon ol ogen o. <sup>18</sup> Didile kaduwakun igeet zooze o Joowo een didi. Ma zóó onane ŋaatonooŋ alaŋ arom ii kibeem akóm. Bar mā kazi ne, Ii kakun, kakun didi. <sup>19</sup> Baale naana ki Silas been Timozi kuuwakteyun igeet kaviyak o Yesu Kiristo ween ŋeerti Joowo. Ma Yesu Kiristo alaŋ aŋer zóó. Mā uduwa niini gi ci aduwa, odota, ibil nōkō. <sup>20</sup> Yesu nēen o anyek zóó o Joowo aterket dook keelit tō. Gi o zin góon kanyeke naana Jook zany ŋaaten Yesu, ma kanē ne, Nónón nēen o nēen.

<sup>21</sup> Jook nēen o anyet ageeta ki igeet buk kagaac kakati naaga Yesu Kiristo. Eŋerawet Jooi ageet kiziti ol cigin. <sup>22</sup> Ma areket niini ageet bayen ka kagaac kakati naaga nónón. Ma buk areket niini Vóniz onin zinzeeti ogaac ka keyeleyet ageet gi o katin didi anyet niini kaal baal aterkedeket e dook.

<sup>23</sup> Karoŋnyun zin inoko agaac gi ci alaŋaan kakōye ŋaatonooŋ ka kook kicinun o. Alaŋaan kakō o, eeci alaŋ karoŋ kook kanyun otoborteyan nōŋ ŋaati kagernyekun óróót. Zin aga Jooi alaŋ naana kavolon zooze nico. <sup>24</sup> Alaŋ karoŋnya kabaltun igeet, ma karicanekun kaal ci ka utuweec, eeci kagaya naaga adoknu niiga tuwenta. Bar olla kaliŋliŋ naaga dook kodoye ka ataltō niiga dook.

**2** <sup>1</sup> Zin giye nico alaŋ karoŋ kiyyayun bodo ka kanyun otoborit nōŋ. <sup>2</sup> Mazin yo mā kanyun igeet otoborit nōŋ, anyan koca aneet talniin ŋene? Akóm eet oma ci ka kanyan aneet talniin, bar zin igeet doon o koca kanyun otoborit nōŋ. <sup>3</sup> Gi baal zin kayeedekun igeet warage baale e nēen, eeci alaŋ karoŋ kook ŋaatonooŋ. Alaŋ karoŋ kook kotoboreyun nōŋ igeet ol o waan bar abon anyan katalō. Kaga nōkō mā katalne naana, atalninu buk niiga. <sup>4</sup> Kayeedekun zin waanice warage ci baal oowu neke luwanta. Alaŋ kayeedekun warage nice ka kanyun otoborit nōŋ, bar karoŋ ka agaac niiga kareezun didi naana igeet óróót.

#### Otontek ol kaal o ger agoonekun

<sup>5</sup> Ma eeti baal kaduwakun waragewa kanekun ne, Agóon kaal ci ger e, alaŋ anyan kotobor nōŋ naana doon, bar buk anyun niini bornet nōŋ ci miliny igeet ele. Alaŋ zin karoŋ kirican gi nico óróót. <sup>6</sup> Ma payiin baal apayek ol ci meel ŋaatonooŋ nónón e agano ki nónón. <sup>7</sup> Inoko zin otontek nónón gi nice, bar abon adizkeku nónón ka calañ bodo abor nōŋ ma alaca ele. <sup>8</sup> Kilalekun igeet ka eyeltek nónón gi o didi areezu niiga nónón. <sup>9</sup> Kayeedekun zin waanice warage baal oowu e ka kicinawun igeet mā didi azoonu niiga zóó o kaduwakun o dook. <sup>10</sup> Mā ooŋneku niiga eet nice gi ci ger baal agóon o, kooŋnei buk naana nónón gi nice. Eeci mā kooŋnei naana eet gi ci ger agoonekan aneet, kooŋnei naana nónón dōyize o Kiristo giye ci akanun igeet. <sup>11</sup> Abon zin kooŋnek naaga eet nico gi ci baal agóon o ka calañ amogjet Loryen ageet, eeci kaga naaga kaal o aróon kutugu Loryenti nōkō.

#### Anyet Yesu Kiristo mogiin

<sup>12</sup> Iiten baale akō mazi kakunai kutur o kazi Toras ka kuuwak kaviyak o Kiristo, kacin anyan Manyi waŋi ci appe óróót ka kuuwai kaviyak ogin. <sup>13</sup> Bar zin waanice avir ziniz, eeci ŋaan kojowa gótóna o tuwento kazi Titos ŋinaante. Kotonjani ol ŋinaante kidiceya koowa looce o kazi Masidoniya.

<sup>14</sup> Abon zin kanyek Jook zany, eeci ŋinti olla kavōyi, naaga o anyet niini ageet dōyiz ci kamōgi kaalyan gole o Yesu Kiristo. Ma anyek Jooi ol kagaac Kiristo loocok dook ŋaaten ageet. <sup>15</sup> Keel naaga kiyo karacoc o amadi, ma aŋol kadala ol dook o. Kanyek naaga ol o ka katin korogit kagaac Kiristo, ma kanyek buk ol o ka katin kuulalte kiziiyt kaviyak o Kiristo. <sup>16</sup> Ma kaviyawa o

Kiristo akati daayiz ole o katin uulali, bar bodo een roget ole o katin arogi. Njeneen zin ci anim kuuwak kaviyak ci adoi kak noko? Akom eet ci anim. <sup>17</sup> Alañ zin naaga kuuwaka kaviyak o Joowo gole ci atobo ki o goon uuwayi ol o aronj guruc. Bar kuuwaka naaga kaviyak nicoko o, eeci itoonet Jooi ageeta, ma kuuwaka naaga kaviyak o Kiristo zinzeetine ci abon giye o koromtozeka naaga noon, ma azii Jooi kaal o kaduwana naaga dook.

#### Diñdiñon o terkediin o colai

**3** <sup>1</sup> Inoko giye nico niiga acinetu ageeta kabolola kaale o goon kagoona? Akom! Inoko acinetu ageeta karoonye eet ci ayeedekun igeet warage ci akati kaal o goon abon kagoona kiyo goon aronj ol ogen o? Akom! Inoko buk niiga acinetu ageeta karoonye eet oma njaatunoon keteyet warage akati ci kaal o abon goon kagoona naaga njinaante? Akom! <sup>2</sup> Alañ karoonye naaga waragenya ci atitinyet ol ageeta, eeci baayizi cunoon o atobo kibeen warage ci ayzak ol gi o didi kaliñliñoneka naaga Kiristo juruñ. Kagaya naaga zinzeetine ogaacak bonat o zinzeeti ugoocok noko, ma buk ol dook icinit kaal o abon agoonu niiga baayize unoon. <sup>3</sup> Zin giye nico eelnu niiga baayize unoon kiyo warage o ayeet Kiristo, ma anyet ageeta ka konyowozteya naaga ol oogi o. Alañ ayeedi warage nici galama, bar Vñiz o Jook o anyet roget neen o ayeet zoz. Alañ atobo zoz nici kibeen lotinok o Joowo baal ayeedi biyene o zabal agirgir e, bar ayeet Vñizi o Joowo zoz nico zinzeetine ugooc.

<sup>4</sup> Kaduwana naaga zoz ci abon akanuñ igeet o, eeci Kiristo neen o ayzaket ageeta kagaya agoonu niiga didi kaal ci abon nje o Joowo. <sup>5</sup> Naaga eleetine cigaacak o doon alañ kanimnya kutuguza liñliñon ci Joowo noko been neen, bar zin anyet Jooi ageeta doyiz ci kaliñliñnya. <sup>6</sup> Anyet Jooi doyiz ci ka kuuwakta kaviyak o abon o akati terkediin onin colai. Ma terkediin ci colai noko alañ een lotinok baal ayeedi, ma anyaa daayiz e. Bar terkediin ci colai noko anyaa roget gole o Vñiz o Joowo.

<sup>7</sup> Ma terkediin baal reen e lotinok o Joowo baal ayeedi biyene o zabal agirgir e neen. Ma lotinowa nica avu diñdiñonte ci appe oroot. Makacin waanice nje o Mosis otowe kataaraanit kiyo ii o, ka calañ ol o Israyil agelem noon. Bar njintimiliny noko alañaan nje onine bodo ataranit. Ma lotinowa nica vura ivita anyaa daayiz. <sup>8</sup> Ma terkediin ci baal reen neke aku diñdiñonte ci appe, bar zin kaga naaga terkediin ci colai anyaa Vñizi o Joowo o adiñdiñ niini oroot kujuk baal reen e. <sup>9</sup> Ma terkediin baal reen apayek ol dook gerzitin e adiñdiñ oroot, bar zin kaga naaga terkediin ci colai o anyek niini ol kobonta nje o Joowo, adiñdiñ niini oroot kujuk baal reen e. <sup>10</sup> Ma terkediin ci colai o anyak diñdiñon ci appe oroot, makacin terkediin baal reen e okoma noon diñdiñon. <sup>11</sup> Ma zin giye o anyayi terkediin o reen baal abil njintimiliny e diñdiñon, kaga naaga terkediin ci colai abil been neen o, anyak niini diñdiñon ci adikir oroot kujuk nice.

<sup>12</sup> Zin giye o kagawi naaga terkediin ci colai o anyak diñdiñon, kanyak naaga moozet ci kuuwayi terkediin ci colai noko zinzeetine oroot. <sup>13</sup> Alañ naaga katobo ki Mosis baal abun nje ruma ka calañ acin ol o Israyil nje onin baal alanyit e, njaati alañaan alanyici juruñ kotobto ki baal oowu e zee makacin izi ñim e. <sup>14</sup> Ma waanice ol o Israyil alañaan anim kagaac terkediin nice kiyo eeti o abun kebere ruma, ma alañ anim kicin o. Mayo nuun een waanico o ele, mā akcep ol o Israyil terkediin o reen waragewe o Joowo, alañ anim niigi kagaac keñ cin kiyo abun kebere rumanen calañ acine o. Bar zin mā oromozek eeti oman njaatunoon Kiristo, akoli noon zo wak, ma aga keñ ci terkediin o reen, kiyo aaryai njaatin rum baal abun kebere ogin e. <sup>15</sup> Mayo nuun een waanico o ele, mā akcep ol o Israyil zozok o Mosis akati terkediin o reen, alañ aga keñti cigec kiyo abun noog kebere rumanen o. <sup>16</sup> Bar zin mā atu niigi Manyi, abil koca kiyo aaryai rum noog keberen o. <sup>17</sup> Manyi zin neen ween Vñiz o Joowo ma njino aavi Vñizi o Manyi anyak baayiz yaak. <sup>18</sup> Inoko zin bar naaga dook kutuweec Yesu, ma keelit kiyo aaryai njaatinai rum o abunnet kebere o, ka keyelizta naaga diñdiñon o Joowo. Ma diñdiñoni ci Joowo noko aku njaaten Manyi ween Vñiz, ma otowet ageet keelit kiyo niini o, ma anyaaawet niini ageet kivita kozolit kibeen noon diñdiñon onin golowe dook.

#### Arokzet ona tammu tadenu

**4** <sup>1</sup> Jook zin neen o anyet ageeta bonate onin liñliñon ci kuuwaye naaga ol terkediin ci colai noko. Zin giye nico alañ naaga kalacana eleeti. <sup>2</sup> Bar goon kuuwaka kaviyak ci abon, noko gole calañ kalabana ol ka kutuy. Alañ kaduwana volon. Kaburna naaga njaati kuuwaka kaviyak ci abon noko gole ci ger anyaaet alyaan ola. Bar kuuwaka zoz ween didi nje o Joowo juruñ gole ci ka kagayi ol dook zinzeetine ugeec zoz o kaduwana naaga een didi. <sup>3</sup> Mā anyak ol ci aliita noon zoz nici, coma een koca niigi ol o ka katin kooto gooye o Loryento doon. <sup>4</sup> Alañ niigi atuwe o, eeci Loryenti o abal looc nico uulal noog ooti ugeec, ka calañ acin niigi vooritin o kaviyak o abon o aduwa zoz o diñdiñon o Kiristo. Ma Kiristo atobo niini ki Jook. <sup>5</sup> Alañ zin kuuwaka naaga zoz ci akati eleeti ogaacak, bar kuuwaka zoz ci kaviyak o Manyi Yesu Kiristo. Maje naagalya olla kayelzana gi o keegina gabara cugocok zaare o Yesu. <sup>6</sup> Baale ma eenya Jooi looc e, azi ne, “Abon vooritin ataran muur.” Inoko zin buk anyet Jooi ageet kagaac didi vooritin o diñdiñon onin abil nje o Kiristo.

<sup>7</sup> Ma liñliñonti ci anyet Jooi ageeta noko atobo ki arokzet ci adikir oroot. Olla zin naaga keelna kiyo ijunya o labak een todo aronek kaala o arokzetu o, ka keyelizai gi o akuni dooyi ci appe noko Joowa, alañ een dooye cinaañ. <sup>8</sup> Kanyaka goon naaga piryakzet tup, bar piryakzet nici alañ amogjet ageeta. Abiirnet goon ageeta ooti piryakzete nico, bar alañ kalacana eleeti. <sup>9</sup> Agidet goon ol ageeta, bar Jooi njaan kotonjet ageeta been neen. Aruket goon ol kiitazaya looc, ma bar bodo kiñaana labak. <sup>10</sup> Kajonjoza goon naaga daayiz eleetine cigaacak o tup noko, ka goon kadaakta kiyo baale Yesu e, ka zin buk kicinit ol baayiz o Yesu baayize onañ eleetine ogaacak. <sup>11</sup> Kajonjoza goon naaga daayiz o, eeci kaliñliñoneka Yesu Kiristo, ka keyelizawa naaga roget onin njaaten eleeti ogaacak adaai. <sup>12</sup> Zin giye o kuuwaka naaga kaviyak o abon, ajonjozet ageeta daayizi oroot. Bar zin niiga ujuktawu roget, eeci kuduktayun igeet kaviyak o abon.

<sup>13</sup> Azi eeti oman waragewe o Joowo ne, “Kazooz o, eeci katuwe.” Abil zin buk njaatinañ noko. Kazooza o, eeci katuwena.

<sup>14</sup> Kagaya naaga Jooi baal njaani Manyi Yesu daayiza e, njaanet buk tijeere ageeta ki Yesu daayiza, ma anyaanet tijeere niini ageet dook kibeen igeet kivita keelit nje onin. <sup>15</sup> Ma piryakzet cinayan o dook abon ka kitiritun naaga igeet, ka ol ci meelik kivita kojokta deten o Joowo, ka zin kanycek niigi Jook zany giye o agoonek niini noog.

<sup>16</sup> Zin giye nico alañ naaga kalaca eleeti been neen. Mayo nuun eleeti cigaac o avo ki daayiz o, maje tuwen onai azaaci kodok zinzeetine ogaac iinya dook. <sup>17</sup> Ma piryakzet ci kapirane naaga noko gi ci miliny ter, ma alañ buk ako njinti wun. Bar zin piryakzete nico anyet tijeere Jooi ageet diñdiñon ci appe oroot ci abil been neen. Ma gi nica appe oroot kujuk piryakzet nico.

<sup>18</sup> Alañ zin abon njaati kareke naaga ooti piryakzet ci iinya ci miliny noko, bar abon kabaaban kaal o njaan kicinit inoko o, ma tijeere kaal nica eel been neen.

## Eleeti ogaac colai tammu tadenu

**5**<sup>1</sup> Ma eleeti cigaac o loota njina eel kiyo ceezi o kari kər o. Kanyak naaga eleeti nicoko njintimiliny. Mazi kadaai, koojnek looc njina. Kaga zin naaga ma kadaayito, ma kotojtek eleeti nicoko looc, ako anyet bodo Jooi ageet eleeti ci colai tammu tadenu. Jook neen o agooṅakēt ageet eleeti niceke ka korogit noko been neen.<sup>2</sup> Inoko zin kipirya naaga eleetine ci loocu noko, ma karooj ka kooṅo kanyayit eleeti o colai tammu tadenu.<sup>3</sup> Tiṅeere ma kadaai, alaṅ katobo ki miniṅ o akom eleeti, bar kavō kanyak naaga tiṅeere eleeti ci colai.<sup>4</sup> Maje inoko njinti njan rak karogni naaga loota njina noko, kapirna ɔɔot. Alaṅ zin karooj daayiz, bar karooj eleeti o colai eel tammu tadenu, ka eleeti cigaac adaai noko kirigizit gōoṅja ci arogi been neen.<sup>5</sup> Idimdimaneyet Jooi ageet gi nico laadun. Ma anyet niini ageet Vōjiz onin ka keyeleyet ageet didi tiṅeere kajowa naaga kaal nicoko dook.

<sup>6</sup> Zin giye nico tup noko kanyak naaga moozet. Kaga naaga manjan rak kanyak eleeti ci loocu noko o, alaṅ rak karome ki Manyi tammu tadenu.<sup>7</sup> Ma njinti njan kabaai loota njina o, katu Manyi, bar alaṅ kacin nōoṅo.<sup>8</sup> Keegin zin naaga moote, ma karooj kotojēt eleeti ci loocu noko ka kooṅ koromte naaga ki Manyi tammu tadenu.<sup>9</sup> Zin giye nico yo nuun kabaak loota karabōj een tammu tadenu, njan ni kamena naaga kōoṅnōj noko ka katalo Manyi njatinai.<sup>10</sup> Karooj naaga kanycek nōoṅo katalo o, eeci tiṅeere naaga dook keel njume onin ka kapayet niini ageet. Apaket tiṅeere niini ageet eet co gōon njatinai kaale ogin baal gōon agōon niini loota njina e. Ma da gōon agōon eeti kaal ci ger, apayek buk Jooi nōoṅo zōz ci ger. Mā agōon da gōon niini kaal ci abon, apayek buk Jooi nōoṅo tiṅeere zōz ci abon.

## Gol o lajotizet onai kibeem Jook

<sup>11</sup> Zin giye o kaṅolina naaga Manyi, koorya nōj ɔɔot ka kivitak ol nōoṅo. Agayet Jooi ageeta zinzeeti ogaacak ɔɔot. Karoojnyuṅ zin buk naaga igeet zinzeetine ugooc agayetu ageeta.<sup>12</sup> Ŋedet kaduwakuṅ naaga kaal ci abon kagoona o, alaṅ zin bar kabolola. Bar karoojnyuṅ naaga igeet ka atanaaz Jook njatinanaṅ. Karoojnyuṅ zin igeet inimit njati aduwaku gi nico ol o gōon abololi titinyon ci liṅliṅon o akati ele eci bitaalu doon, ma alaṅ bar abololi zinzeeti bonat.<sup>13</sup> Azi gōon ol ogen ne, Aamnyet ageeta maṅōnnya. Zin mā aamnyet maṅōnnya, abon labak ka kanyaaktaya Jook diṅdiṅon. Mazi alaṅ aamnyet maṅōnnya, bar zin katirituṅ naaga igeet.<sup>14</sup> Zin giye o areezet Kiristo ageeta, kagoona kaal dook ka kanyceya nōoṅo katalo. Kaga naaga Kiristo adaai ole dook, ma ozolit ol dook ki nōoṅo daayiz onin.<sup>15</sup> Adaak niini ole dook, ma itija daayiza ka ol o anyek niini roget dook korogtek nōoṅo calaṅ een eleeti ugeec.

<sup>16</sup> Alaṅaan zin bodo kaṅaamnek naaga ol gole o eet o deer. Yo nuun baale kapayit Kiristo gole o eet o deer e, alaṅaan bodo inoko kagoṅo noko.<sup>17</sup> Mā oromozek eeti Kiristo, otowe niini izi eet ci colai. Alaṅaan bodo abil kiyo baale e, bar abaawun niini baayiz ci colai.<sup>18</sup> Jook zin neen o agōon kaal nicoko dook. Anyet niini bodo ageet kiziti lajotigin njaten Kiristo. Ma buk anyet liṅliṅon o kanyaaki naaga ol oogi nōoṅo ka kiziti niini been nōoṅo lajotigin buk.<sup>19</sup> Zōz zin o gōon kuuwaka naaga neen o. Anyeke Jooi ol o loocu dook kizito lajotigin been nōoṅo njaten Kiristo. Alaṅaan bodo niini Jooi aada oṅe ugeec baal agōon e. Ma anyet niini ageeta dōyiz ci kaduwakuṅ igeet zōz kiyo aduwakuṅ Jooi niini alya o. Kalayuṅ zin naaga igeet zaare o Kiristo ka anycek niiga Jook gol ci anyuṅ igeet iziti lajoten kibeem nōoṅo.<sup>21</sup> Eeci Kiristo njan niini kabaca oṅec been neen, bar zin anyek Jooi nōoṅo kizi todoyoi ci aara oṅe njatina, ka kozolit naaga kibeem nōoṅo bonat o Joowo giye o koromtozēke naaga nōoṅo.

## Piryakzet o Pōl

**6**<sup>1</sup> Ma giye o kaliṅliṅoneka naaga Jook, kilalekuṅ igeet giye co. Inoko ojoktawu niiga deten Joowa. Mazi ojoktawu o, mā bodo acelbezanu.<sup>2</sup> Azi Jooi waragewe onin ne, “Kiziiwa luwa unooṅ iitene baal katalnine njatunooṅ ka kitirituṅ e, ma kuruguzuṅ igeet iiten nice.” Iziikto zin di. Iiten zin baal atalnin Jooi njatunooṅ ka kuruguzuṅ e neen nici.

<sup>3</sup> Akom naaga gi ci ger kagoona ka kalam ol njati avunake Kiristo. Kagoona noko o ka kōkōm eet ci apez liṅliṅon onanaṅ Joowo.<sup>4</sup> Bar kayeleka naaga ol dook gi o didi kaliṅliṅoneka naaga Jook juruṅ golowe dook. Ma kameza gōon naaga piryakzet ki giden zinzeetine ci alal.<sup>5</sup> Aruket gōon ol ageeta, ma avoyet cabiin, ma arōoṅ gōon kuruktet kōle kadaakta. Kaliṅliṅnya gōon naaga ɔɔot, ma alaṅ koogina baalinowe ogen, ma kaavtiya magizet.<sup>6</sup> Kayelzana gōon naaga gi o kanyaka dōyiz o Vōjiz o Joowo kibeem reezinet onin een didi gole o kabaaka baayiz o abon, ki genyiza, ki irkenta, kibeem zinzeeti laliza.<sup>7</sup> Kuuwaka gōon naaga kaviyak ween didi dōyize o Joowo. Ma kabaaka gōon naaga baayiz ci abon njume o Joowo ka bonati cinaṅ o kizi dilanya, ma een kilibwa cigaacak kigaṅina, ma buk keelana eleeti.<sup>8</sup> Ol ogen gōon atitinyet ageeta, maje ol ogen apezet. Ol ogen adomnyet, maje ogen anaatet. Anyek ol ogene ageeta kizita volonjyok, bar zin didi alaṅ abil noko.<sup>9</sup> Kapezina naaga loota njina kizita kaal ci labak, bar zin Jooi agayet ageeta. Kajōjōza gōon daayiz ɔɔot, ma bar njan karugna labak kiyo acinetu niiga ageeta noko. Aruket gōon ol, bar njan kadaakta.<sup>10</sup> Kapirmana gōon ɔɔot, ma bar katalnina labak. Kamaana naaga ɔɔot, ma bar bodo kanyeka ol ci meel kiziti arōk zooze o Joowo. Akomnet gi ci kanyaka kina, ma bar bodo kaala dook kaal cigaacak njume o Joowo.

<sup>11</sup> Lajotigaacak o kareezuṅ Korintiya, inoko kōbōrtayuṅ naaga igeet kaal dook lai labak. Kareezuṅ didi naaga igeet ɔɔot ele.<sup>12</sup> Njan kareezuṅ naaga igeet zinzeetine ogaacak dook noko, maje bar niiga alaṅaan areezetu ageeta.<sup>13</sup> Karooj zin kuduwayuṅ naana igeet gi ce kiyo dōlya ogane o. Abon areezetu buk niiga ageeta kiyo kareezuṅ naaga igeet o.

## Edeyai ole o alaṅ atuwe

<sup>14</sup> Mā acanonu kibeem ol o alaṅ atu Kiristo njatodoi. Zōz nici alaṅ awoya, eeci laadun gōon bonati ki gerzitin alaṅ arome. Ma buk muuri ki vooritin alaṅ arome.<sup>15</sup> Inoko Kiristo ki Loryen arome njatodoi? Akom kina! Gitaz zin yo ci ka karom ol ci atuwe kibeem ol calaṅ atuwe njatodoi o? Inoko gōon joowane o adilyai agano njati arōneke cez o Joowo? Akom kina! Keegin zin naaga cez ci Jook o arogi, ma Vōjizi o Joowo aavi njatinai. Azi Jooi ne, “Njan kako karomena kibeem ol ogan, ma korkorya ki nōoṅo, ka kizi naana Jook uneeṅ, ma eegin niigi ol cigan.”<sup>17</sup> Ma giye nico azi Jooi bodo ne, “Eṅjerta eleeti ola ɔɔoṅ niiga doon. Mā uumnyu kaal ceen ririny njume onan been neen ka zin kagamawuṅ naana igeet.”<sup>18</sup> Keen tiṅeere naana baatunooṅ, ma eeginu niiga njeeṅigan been beenyigan.” Aduwa gi nico Jooi o anyak dōyiz dook.

**7**<sup>1</sup> Lajotigan o kareezuṅ, zin giye o aterkedeket Jooi ageet kaal nicoko, abon kadewa naaga eleeti kaale o anyek ele kibeem vōjiz kizi ririny njume o Joowo. Abon kōoṅnōj ɔɔot ele kobonta kiyo Jooi o, eeci kaṅole naaga nōoṅo.

## Talnin o Pɔl

<sup>2</sup> Abon areezetu niiga ageeta zinzeetine ugoocok dook, eeci ɲaan laadun kutuguzeya naaga eet oma ɲaatunooŋ gi ci ger been neen. Ma ɲaan buk kedemezteya eet oma ɲaatunooŋ kaal ci ger. Ma ɲaan buk kalabtawa ɔl oogi ɲaatunooŋ kaal cigeec been neen.

<sup>3</sup> Alaŋ kaduwa gi nico o ka kapayun igeet. Kuduwayun rak uyene keneyun ne, Kareezun naaga igeet ɔɔɔt, ma karome ki igeet tup, inoko o zee been katin, yo nuun te kadaai karabonŋ karogi. <sup>4</sup> Kaduwakun igeet zɔɔz ceen didi ce. Katuyun naana igeet, ma kabololuŋ ɔɔɔt ele, eeci idizikteyanŋ niiga aneet kanyak moozet ki talniin. Mayo nuun kapirna naaga dook o, katalne naana labak.

<sup>5</sup> Iiten baal kavunaka looc o kazi Masidoniya e, kivita buk bodo kigidewa ɔɔɔt ele. Kojoktawa waanice giden vitenane dook ɲinaante. Koota kadaŋtowa kibeen ɔl oogi ɲinaante zee makacin otoŋole zinzeeti looc. <sup>6</sup> Bar zin goon laadun Jooi adizkek ɔl ɲaati arɔɔŋ alacan eleeti. Zin buk idiziyeyet niini ageeta giye o itoonane niini Titos kiiyaket ageeta. <sup>7</sup> Waanice zin iya idiziyeyet Titos ageet, eeci iyyayet niini, ma iya uduwayet goɔl baal da adizkeku niiga nɔɔnɔ e. Ma aneket ne, Arooŋnyu niiga icintanŋ aneet, ma abadu mony oŋene ugooc. Ma iinonanŋ aneet, ma arooŋnyu goɔl ci eelananŋ. Zin kaale nicoko inoko katalɔ naana ɔɔɔt ele.

<sup>8</sup> Mayo nuun abornu niiga noŋ waragewe baal kayeedekunŋ igeet ɔɔwa e, alaŋ naana kabadi mony been neen. ɲedet waanice kaga nɔkɔ akɔ waragewi nica anyunŋ igeet otoborit noŋ ɲintimiliny o. <sup>9</sup> Bar zin inoko katalɔ. Alaŋ zin katalne naana, eeci iiten baale kanyunŋ otoborit noŋ, bar katalne o, eeci bornet noŋ nica anyunŋ igeet abadi mony oŋene ugooc. Arooŋnyunŋ Jooi igeet otobortek noŋ oŋe ugooc. Zin giye nico ɲaan akom gi ci ger kagoonekunŋ naaga igeet. <sup>10</sup> Anyet goon Jooi ageet zinzeeti wuciz ka kabadit mony oŋene ogaac, ka kojokta naaga roget. Abon zin katalna naaga gi nico. Bar zin goon zinzeeti wucizi ci ɔl o loocu anyaaak nɔɔgo daayiz. <sup>11</sup> Icinit di! Anyek Jooi zinzeeti wuciz unooŋ waanice kanyaayunŋ goɔl ci abon. Ma zinzeeti wucizi anyunŋ igeet orooŋit eyelizta ɔɔɔt ele gi o akomnuŋ gi ci ger agoonu. Ma anyunŋ otobortek noŋ baciinok ugoocok, ma anyunŋ ɔtoŋolte Jook. Ma buk anyunŋ orooŋit icintetu ageeta ɔɔɔt. Ma anyunŋ orooŋit goɔl ci apayeku piryakzet eet o agɔon kaal o ger ɲaatunooŋ. Zin giye nico eyelezawu niiga gi o akomni gi ci ger agoonu. <sup>12</sup> Zin kaale nicoko dook keteyeedeyunŋ igeet warage nice. Alaŋ kayeedi o giye o eet o agɔon oŋec ɲinaante, karabonŋ een giye ci eet ci agoonek eeti nici gi ci ger. Bar kayeedekunŋ warage nice o ka keyeleyunŋ igeet gi o areezetu niiga ageeta ɔɔɔt ɲume o Joowo.

<sup>13</sup> Zin idizikteyetu niiga ageeta ɔɔɔt giye o ayzalanu reezinet o areezetu niiga ageeta. Buk katalnina naaga giye baal agoonu Titos jurunŋ katalɔ, makacin ereyek nɔɔnɔ ɲoliin baal anyak niini ziniza e. <sup>14</sup> Kuduwaya iiten baale nɔɔnɔ kaal ugooc abon agoonu dook. Zin didi giye o abon agoonu niiga eleemnyai kaal nica dook, ma ɲaan anyaaktayanŋ aneet alyaan. Goon laadun tup kaduwakunŋ igeet kaal ceen didi. Ma bodo buk bɔlɔlɔni o kabolola naaga ɲaatunooŋ baal kaduwaka Titos e izi didi. <sup>15</sup> Goon ma aada Titos gi baal aziiknanŋ niiga aneet, ma azoonu zoozok ogan e kibeen buk gi baal atalnanu niiga nɔɔnɔ titinyonta jurunŋ e, areezunŋ niini igeet ɔɔɔt ele. <sup>16</sup> Katalne zin naana ɲaatunooŋ ɔɔɔt, eeci kaga naana ɲaan agoonu kaal ci abon.

## Itiritit ɔl o amaata

**8** <sup>1</sup> Gɔɔnɔga o tuwento, karoŋnyunŋ naaga igeet agaac gi o anyek deteni o Joowo ɔl o tuwento Masidoniya kutuguzo. <sup>2</sup> Anyak niigi piryakzet ci appe ɔɔɔt kaale ci ger acina nɔɔgo, bar zin waanice atalne labak, ma ayelza irken uneŋ adikir ɔɔɔt, mayo nuun niigilya amaata o. <sup>3</sup> Didile alaŋ kavolonŋ. Alota waanice niigi kaal ci meel ger kujuk bar kaal o anyak niigi eleetine ugeec. Ma anyan aneet kaal nicoko ka kooyi ole o tuwento amaata Judiya. Aada gi nico niigi doon zinzeetine ugeec. <sup>4</sup> Ma ilaleket ageeta ka kanyceya nɔɔgo waji ci ka kitiriti ɔl o tuwento amaata kiyo buk agɔon ɔl o tuwento ogen o. ɲaan naaga kadaŋteya nɔɔgo kutuguzo gi nico. <sup>5</sup> Rak ɔɔwa anyek niigi eleeti ugeecik Manyi, ma vurta anycet buk eleeti ugeecik ageeta kiyo arɔɔŋ Jooi o. Ma gi nici appe ɔɔɔt ele, ma alaŋ waanice kagaya agɔon niigi tiŋeere gi nico didi.

<sup>6</sup> Iiten baale rak itiritunŋ Titos igeet ka akata liŋliŋon ci alutu guruc ci atiritu ɔl o amaata kiyo buk agɔon ɔl o Masidoniya o. Inoko zin kijinta nɔɔnɔ ka kook bodo kitiritunŋ niini igeet idica liŋliŋon cunooŋ abon noko. <sup>7</sup> Ayelzai bonati o Joowo ɲaatunooŋ golowe ci meelik ger. Anyaku niiga tuwen ci appe ɔɔɔt, ma anyaku ɔl ci meel ci uuwak zɔɔz o Joowo, ma anyaku genyiz ci adikir ɔɔɔt, ma arooŋnyu utuguz kaal ci abon tup, ma areezetu ageeta ɔɔɔt. Karoŋnyunŋ zin buk naaga igeet anyayit irken ci adikir ɔɔɔt gole ci atiritu ɔl ci amaata noko.

<sup>8</sup> Alaŋ kadaŋekunŋ naana igeet goɔl ci ka anyceke ɔl o amaata kaal, bar olla karoŋ kicina doyiz ci reezinet unooŋ ɲaati aziiknu ɔl oogi atiritit gɔnɔgi kaale ci meelik ger. <sup>9</sup> Agayu ri niiga bonat o Manyi Yesu Kiristo noko. Baale tammu tadena e aroi niini ɔɔɔt ele, ma bar iya anyek niini ele katamaat loota ɲina ka ojokta niiga arɔkzet maatize onin.

<sup>10</sup> Gi ci zin kabaaban naana abon agoonu niiga ce. Abon amenanu agoonu liŋliŋon o tirtento baal akatawu irkite baale laadun e zee ma adicanu. Irkite nice eeginu niiga ɔl baal laadun akananu baabani o tirtento e neen, ma buk eeginu ɔɔ ɲaati alutanu guruc o atiritu ɔl niceke. <sup>11</sup> Emeda zin utuguz liŋliŋon cunooŋ o zinzeetine ugooc dook ebaal laadun abaabananu e zee ma adicanu. Itiritit ɔl kaale o anyaku. <sup>12</sup> Mā arɔŋ eeti kitiritit gɔnɔgi oogi kaale cigin anyak, abon anyek niini nɔɔgo ci te olla anyak niini o zinize onin dook. Atalne Jooi eeta ɲaati anyeke niini ɔl kaal ci agano ki kaal cigin anyak o zinize onin dook. Mā akom niini kaal ci anyak, alaŋ adaŋek Jooi nɔɔnɔ kanyek ɔl kaal calanŋ anyak o. <sup>13</sup> Alaŋ karoŋnyunŋ igeet itiritit ɔl oogi zee makacin bar ɔkɔmawunŋ igeet gi ci anyaku. Bar olla karoŋnya ɔl dook kotobto. <sup>14</sup> Inoko zin anyaku kaal ci meelik, ma animnyu itiritit ɔl ci amaata o labak. Bodo buk iima mā amaanu niiga, anyak bodo niigi kaal ci meelik, ma buk atiritunŋ niigi igeet. Ma gole nico atobɔ ɔl dook. <sup>15</sup> Kiyo azi waragewi o Joowo giye ci akati dayiin baal anyek Jooi ɔl balala e ne, “Ma eeti ci alota dayiin ci meelik, alaŋ anyak dayiin nicoko ɲinti reen. Maje eeti ci alota ci miliny, aleeno nici kibeen nɔɔnɔ labak.”

## Titos been ɔl o itoon Pɔl ki nɔɔnɔ

<sup>16</sup> Kanyeka naaga Jook zany, eeci anyek niini Titos kereez goɔl ci atiritunŋ igeet kiyo buk naaga o. <sup>17</sup> Ako mazi kajina nɔɔnɔ ka kook kitiritunŋ igeet, agama didi niini gi nico. Inoko zin ɲaan akɔ ɲaatunooŋ, eeci arɔŋ niini oowe onin doon kook kitiritunŋ igeet ɔɔɔt. <sup>18</sup> Kitoona zin nɔɔnɔ kibeen goon oma ci goon areez ɔl o tuwento nɔɔnɔ vitenane ci meelik giye ci uuwayi niini kaviyak o Joowo ɔɔɔt. <sup>19</sup> Ma buk baale aŋera ɔl o tuwento nɔɔnɔ ka goon korkorta naaga kibeen nɔɔnɔ, ka kitiritit niini ageeta ɲaati kalotana guruc o anyek ɔl gɔnɔgi o amaata. Ma liŋliŋonti nici ayelza gi o kadiŋɲana naaga Jook giye o katirita ɔl. <sup>20</sup> Kitoona zin naaga nɔɔnɔ o, eeci alaŋ karoŋnya ɔl oogi kotoŋomtete ageeta giye ci kizik bar anyak gi ci ger kagoona ɲaati kavɔ kanyowoneka kaal ci meelik noko ɔl o amaata. <sup>21</sup> Karoŋnya naaga ɔɔɔt kutuguza gi ci abon ɲume o Joowo kibeen ɔla buk.

<sup>22</sup> Ma buk bodo kitoona nōnō ki eet oma. Kicintawa eet nico lak ci meelik ger, ma kagaya naaga arōŋ didi niini kitirituŋ igeet ɔrɔt ɛle. Arōŋ kitirituŋ o, eeci agayuŋ niini igeet eeginu ɔl ci abon. <sup>23</sup> Maje Titos o gōŋ kalinjɔnya ki aneet, atiritan niini aneeta gole o ooyi niini ŋaatunooŋ. Maje bodo gōtōnoga ci tuwento een ram o, itoonekuŋ nōŋɔ ɔl o tuwento ka kanyaaktak niigi Jook diŋdiŋɔ. <sup>24</sup> Eyelizak zin niiga rēezinet unoŋ ɔl nicoko ka ɔl o tuwento dook kicinit rēezinet cunooŋ o, ma aga niigi kaleemnya didi giye o kanaatuŋ naaga igeet.

Tirten ci ɔl o tuwento amaas

**9** <sup>1</sup> Alaŋ karoŋ keteyeedeyuŋ naana ci akati guruc o tirtento ka kitoontozek ɔl o tuwento amaas Judiya, eeci agayu niiga gi nico laadun. <sup>2</sup> Kagayuŋ naana igeet aroŋnyu didi itiritit nōŋɔ. Ma kanaatuŋ igeet ole o Masidoniya ŋaato ɔrɔt kanei nōŋɔ ne, “Arōŋ gōtōnoga ogaac tuwento looce o kazi Akaya kitiritit ɔl ci amaas neke irkit nico dook.” Ma giye o aroŋnyu niiga itiriti ɔl ci amaas neke, oroŋit buk niigi ŋaato kitiritit nōŋɔ. <sup>3</sup> Inoko zin kitoonekuŋ igeet gōtōnoga cigaac noko ka kōt kitirituŋ niigi igeet uluta guruc nicoko taman. Ka zin gi baal kabololuŋ naaga igeet Masidoniya ŋaato e kibil tɔ. <sup>4</sup> Mā korkorya ki ɔl oogi Masidoniya ŋaato ka koota kicintuŋ igeet, ma kamōdanuŋ ŋaan idica liŋliŋɔ baal alutu guruc e, aamnyuŋ koca alyaani. Ma aamnyan koca alyaani aneet buk, eeci iiten baale kabololuŋ naaga igeet. <sup>5</sup> Kabaabana zin naana abon kanyi gōtōnoga ceen iiyu noko karakte ŋaatan kōt ŋaatunooŋ, ka kōt kitirituŋ niigi igeet kuluta guruc baal aduwanu e. Ka zin ma kako naana, kamada guruc nicoko eelit tɔ laadun. Ma guruc nicoko aruku niiga ootine ugooc doon, alaŋ adaŋonekuŋ.

<sup>6</sup> Mā anyeku kereyeyuŋ gi ce. Mā adok ɛti dōwo ci miliny, atēda buk tiŋeere niini labi ci miliny. Maje ɛti ci adok dōwo ci meelik, atēda buk tiŋeere niini labi ci meelik. <sup>7</sup> Abon zin gōŋ ɛti ce aruk gi o aŋera niini zinize onin ka kuruk. Mā alaŋ arōŋ kuruk, abon ooŋ calaŋ aruk, eeci adaŋonek, bar zin Jooi arēez eet ci aruk gi onin talniinta. <sup>8</sup> Ma Jooi anyak dōyiz ci anyuŋ igeet kaal ci meelik ger kujuk bar kaal o aroŋnyu niiga zinzeetine ugooc dook. Ka zin gōŋ ojokta niiga kaal o aroŋnyu rogete unoŋ tup ka zin inimit utuguz kaal ci abon meelik. <sup>9</sup> Kiyo azi waragewi o Joowo ne, “Anyek Jooi ɔl o amaas kaal labak irkente onin. Ma kaal o abon agōŋ niini ɛl nōkɔ been neen.” <sup>10</sup> Jook neen o anyek ɔl o eevyi dōwen, ma anyek ɔl dook dayiin. Zin buk gole nico anyuŋ niini igeet dōyiz ci ka anyeke niiga ɔl kaal irkenta. Ma gi nico abil kiyo dōwo o kadok o. Anyek tiŋeere Jooi irken unoŋ kidikir kiyo labina o aduŋna mana o. <sup>11</sup> Anyuŋ tiŋeere Jooi igeet arōkzet ci abil kodot ka buk omocit niiga ɔl oogi irkenta. Ma kavɔ tiŋeere kanyeka ɔl o amaas kaal ugooc atiritu niiga nōŋɔ, anyek tiŋeere niigi Jook zany ɔrɔt. <sup>12</sup> Mazin liŋliŋɔnti cunooŋ noko agōŋ kaal ram. Anyek ɔl o tuwento kojokta kaal o arōŋ niigi ka korogti, ma buk anyek ɔl ci meelik katanaazo Jook. <sup>13</sup> Zin giye ci agoonu noko, eyeliztayi ɔl gi o didi atuwenu niiga juruŋ. Anaas tiŋeere ɔl Jook giye o atuyu niiga zōz o abon akati Kiristo, ma azoonu juruŋ. Bodo buk tiŋeere anaas niigi Jook, eeci iirkeku niiga kaal nōŋɔ kibeen buk ɔl dook. <sup>14</sup> Ma buk tiŋeere areezuŋ niigi igeet ɔrɔt, ma ajinekuŋ Jook kamayuwuŋ igeet giye o eyelezakuŋ niini igeet irken onin adikir. <sup>15</sup> Abon zin kanyek Jook zany irkente onin adikir ɔrɔt zē ma alaŋ kataman buk koobit.

Ayelza Pɔl liŋliŋɔnti onin abon

**10** <sup>1</sup> Kilalekuŋ zin naana Pɔl igeet kaale coko bonate o Kiristo. Azi gōŋ ɔl ogene ne, Keen gonon ŋaati karomen ki igeet, bar ma kadeyai ŋaatunooŋ, kavaraciz kaale o kaduwakuŋ. <sup>2</sup> Kilalekuŋ zin igeet ka utuguz kaal ci abon bonate o Kiristo ka ma kako naana ŋaatunooŋ ka calaŋ kagernyekuŋ kiyo karoŋ kegernyek ɔrɔt ɔl o gōŋ azi ne, Kabaaka naaga kiyo ɔl o loocu o. <sup>3</sup> ŋedet zin didi kabaaka loota, bar zin alaŋ kayowona ki ɔl gole ci ɔl o loocu. <sup>4</sup> Alaŋ naaga koorya ɔl dilanyai kiyo ɔl ci loocu o, bar koorya gerzitin dōyize o Joowo, ma kuulala diŋ. <sup>5</sup> Ma gole nico kōmōkta naaga ɔl o gōŋ adaŋ Jook kibeen ɔl o gōŋ alam gōŋɔ oogi ŋaati agawi Jook, ma kanyeka ɔl o gōŋ amarnin Kiristo kiziti ɔl ci azooni zōz onin. <sup>6</sup> Inoko zin ma uzuutu niiga zoosok o kaduwakuŋ naaga igeet juruŋ, kagernyeka zin koca tiŋeere ɔl o alaŋ aziŋnet ageeta doon.

<sup>7</sup> Gōŋ mā acinaŋ niiga aneet o, aniyu ne, Keen eet ci deer labak. Bar zin ɛti o oromozek Kiristo, abon aga niini koromtozeyi buk naaga Kiristo kiyo niini o. <sup>8</sup> Karabōŋ gōŋ kabolola ɔrɔt dōyize onaan anyet Jooi. Bar zin dōyiz nico anyet Jooi ka kitirituŋ naaga igeet, alaŋ ka kuulaltuŋ. Alaŋ zin aneet aamnyan alyaani, mā da kōbōlola giye nico. <sup>9</sup> Alaŋ karoŋnyuŋ iziti ne, Ayeedeket Pɔl warage nico o arōŋ kabaayet ka kotoŋoli naaga nōnō. <sup>10</sup> Azi gōŋ ɔl ogene ne, Adaŋeket Pɔl waragenyaye ogin zoosok dōyiza. Bar mazi karome naaga ki nōnō ŋaatodoi, akōm nōnō dōyiz, ma bar buk uuwayi onine celbez labak. <sup>11</sup> Abon zin ɔl nico aga tiŋeere ma kavoya naaga ŋaatineŋ, kavɔ kagernyeka nōŋɔ ɔrɔt kiyo buk gōŋ kagernyeka nōŋɔ waragewa o.

<sup>12</sup> Alaŋ naaga kayabzeka eleeti ɔl o azi ne, “Kabonana naaga ɔrɔt.” Ma ɔl nico tarbale ɔrɔt, eeci atitiny niigi eleeti ugeecik maany, ma apayek eleeti bonat ootine ugeec doon. <sup>13</sup> Bar zin naaga kabolola gole ci abon. Kabolola olla naaga liŋliŋɔnti o anyet Jooi ageeta doon. Alaŋ kabolola gi oma. Ma liŋliŋɔnti ci kalinjɔnya naaga ŋaatunooŋ o, liŋliŋɔnti codoi liŋliŋonowe o anyet Jooi ageeta. <sup>14</sup> Alaŋ naaga kabolola gole ci ger, eeci koota baale ŋaatunooŋ, ma kōt kuuwakteyuŋ naaga igeet kaviyak o Kiristo abon. <sup>15</sup> Alaŋ naaga kabolola liŋliŋɔnti ci anyek Jooi ɔl oogi kutuguzo vitenane ogen. Bar karoŋnya tuwen unoŋ kidikir, ka kanyet Jooi ageeta kutuguzo buk liŋliŋɔnti vitenane ogen gole ci atiritetu niiga. <sup>16</sup> Ka zin kinimta naaga kuuwakta kaviyak o abon loocowe o aŋonzonu ki igeet calaŋ kabolola liŋliŋɔnti ci utuguzo ɔl ogen vitenane o anyek Jooi nōŋɔ kilinjɔnti. <sup>17</sup> Kiyo azi warage o Joowo ne, “Ma ɛti ci abolol, abon abololi dōyiz o Joowo.” <sup>18</sup> Zin giye nico mā azi ɛti ne, “Kabona,” alaŋ didi niini abon. Bar mā azi Jooi ne, “ɛti nico eet ci abon,” ɛti nico abon didi.

Pɔl kibeen toonnyak o voloŋo

**11** <sup>1</sup> Karoŋnyuŋ iziizartaŋ niiga aneet zinzeetine ci alal. Yo nuun kazooz tarbalun, iziiktaŋ labak. <sup>2</sup> Karoŋnyuŋ igeet oromtozek Kiristo doon. Kabekuŋ naana igeet ɔrɔt ele kiyo abekuŋ igeet Jooi niinilya o, eeci eelnu niiga ŋaatan kiyo dole ween kabazec o. <sup>3</sup> Bar zin kaŋole ŋaati alabanuŋ tiŋeere ɔl zē makacin alaŋaan anuyu gōl o Kiristo juruŋ zinzeetine ci vōr kiyo baale alaba Loryen ŋaa o kazi Eev genyiza e. <sup>4</sup> Kanyei ŋoliin o, eeci agamanu gōŋ niiga demziinok ci ɔl oogi o uuwaweyuŋ igeet zōz o Yesu gole ci aŋōrōwō ki baal kuuwawekuŋ naaga e. Ma buk gōŋ agamanu niiga vōnjiz calaŋ een Vōnjiz o Joowo baal ajowanu niiga ŋaatinaaŋ e. Ma buk agamanu demziinok ci akati kaviyak o abon ci aŋōrōwō kibeen baal kademzekuŋ naaga e.

<sup>5</sup> Bar zin kaga naana ɔl cugoocek voloŋo gōŋ azi ne, Eegin niigi toonnyak ci titiny neke, alaŋ ajukan niigi aneet. <sup>6</sup> Yo nuun alaŋ kaganeŋ naana zōz juruŋ ŋaati kazōze kōla o, bar zoosok o Joowo kageny ɔrɔt. Ma icintu niiga genyiz nico lak ci meelik ger kaale o kagoon.

<sup>7</sup> Iiten baal kakoye nyaatunooj e, nyaan kook kijinuj guruc ci ka kuuwaweyuj igeet kaviyak o Joowo abon, bar waanice kook kecelbezana ele can o ka odonje niiga. Mayo da zin gi nica gerze nyaatunooj? <sup>8</sup> Ma iinya niceke itoontayan ol ci tuwento ogen guruc. Zin guruc ci baal itoonakan ol neke waanice bar kitirituj naana igeet. <sup>9</sup> Ma buk iinya ci baal karomen ki igeet neke nyaan naana kipirayuj igeet kaale o karoonj, eeci gotonoga baal avu Masidoniya e anyaaktayan aneet kaal o karoonj dook. Nyaan zin waanice naana kipirayuj igeet, ma buk katin alaj kapirnanuj noko been neen. <sup>10</sup> Kaduwakuj kaal nicoko o, eeci zozz o Kiristo een didi aavi nyaatan. Inoko zin tijeere kamena kabolol noko looce cunooj Akaya neke dook. <sup>11</sup> Kagoon noko o, eeci kareezuj naana igeet, ma aga Jooi noko didi kareezuj naana igeet o.

<sup>12</sup> Kamena zin tijeere kagoon noko ka kalam toonnyak o volonjo keelti bololon uneen goon ane ne, Alinjliji niigi juruj kiyo naaga o. <sup>13</sup> Ma ol nicigi alaj een didi toonnyak. Avolonj niigi linjlonje cineen o. Alaba niigi ol giye ci anyeke eleeti kiziti toonnyak ci Kiristo o. <sup>14</sup> Alaj zin ageet abiirnet ooti giye nico, eeci goon Loryen niinilya alaba buk ol gole ci ookci ele kibil kiyo toonnyaiti ci Joowo aku tamma o. <sup>15</sup> Alaj zin buk ageet abiirnet ooti giye ci alaban gabara ci Loryento noko ol oogi gole ci anyeke niigi eleeti kiziti gabara ci Joowo abon o. Nyaan zin katin apak Jooi noogoo iitene ci atorneke kaale ugeec ger agoon.

#### Abololi Pol piryakzet onin

<sup>16</sup> Inoko bodo kabedekere zozz nico kazi ne, Ma anyeku eet oma nyaatunooj kabaaban bar kizik naana Pol keen tarbal. Mazi agoonu noko, abon zin agamanaj kizi tarbal noko labak ka giye nico kobolol kidicilim. <sup>17</sup> Ma kaal ci kabolole naana noko, alaj kaduwa gole o Manyi, bar olla zoosok cigan tarbalzetu doon. <sup>18</sup> Bar zin giye o goon abololi ol ci meelik eo ol o loocu, kabolol buk naana noko. <sup>19</sup> Njedet niiga alya agenyu zozz, ma bar bodo anyeku ol ci tarbal kivita kedemetzuj niigi igeet, ma atalninu niiga nyaatineen. <sup>20</sup> Atalnanu niiga volonnyok o avu adanjekuj igeet utuguz kaal o aronj niigi. Ma anyuj iziti gabara cigeece. Ma aruweku niiga noogoo guruc ugooc. Ma apezuj niigi igeet, ma apanuj vora. <sup>21</sup> Aniyu goon niiga ne, “Pol rongec.” Njedet zin didi keegina rongenen zozz, ma alaj kanimnya kutuguza kaal nicoko.

Bar zin nyaan kamena kazooz tarbalun noko. Ma anyak eet ci abololi niini gi ci abololi, kanim buk naana kabolol labak. <sup>22</sup> Ma een ol nicaga bor ci ol o kazi Ibiro, keen buk naana borit ci ol niceke. Ma een niigi ol o Israyil, keen buk naana eet ci Israyil. Ma een dol ci dol o Ibrayim, keen buk naana dole ci dol o Ibrayim. <sup>23</sup> Ma een niigi gabara ci Kiristo, keen buk naana gabaren ci Kiristo. Inoko kazooz kiyo eeti o tarbal o, bar zin naana kalinjlonje Kiristo kujuk noogoo. Kalinjlij goon naana zozz, ma acabjan ol aneet tup lak ci meelik kujuk noogoo. Arukan goon ol nyaboyen zozz lak ci meelik ger. Kaboca goon daayiza lak ci meelik ger. <sup>24</sup> Izi inoko lak tur ci arukan ol o Juz nyaboye eetom kamoto ki tiin torkoc (39). <sup>25</sup> Bodo lak iyu ci arukan ol o Rom. Bodo lak codoi ci avacan ol biyene aronj kuruktan niigi aneet kadaak. Bodo lak iyu ci kuubene naana kavoolete ci liilu. Ma bodo iitene oman kaboca nyaati waan kadodene, ma kariiti liil keja iiten codoi dook ki baalin karoonj kook dowana. <sup>26</sup> Keeron goon naana lak ci meelik ger. Ma kaboca goon daayiza ka kotodode nyaati kabaayize liilok. Kaboca buk goon daayiza ole o adet ol golowe. Ma kaboca daayiza ole ogan looc onan ele. Ma bodo buk kaboca daayiza ole o alaj eegin Juz. Ma kaboca goon daayiza kuturyowe o adikir. Ma kaboca daayiza balalo. Ma kaboca daayiza ka kotodode liile o appe zozz. Ma bodo kaboca daayiza ole o goon azi ne, Eegin niigi gotonoga ci tuwento, ma bar alaj een didi. <sup>27</sup> Kalinjlij goon naana zozz, ma kipirna kaale ci meelik zozz. Lak ci meelik ger calaj kooje. Goon kawo magizet, ma arukan kor. Ma goon akomnan rumane ci abon kagame laju, ma akomnan buk ceze. <sup>28</sup> Ma kaale nicoko dook goon bodo kiinon naana ol o tuwento loocowe dook ii tup. <sup>29</sup> Ma anyak eet calaj atuwe juruj nyaatineen, kiinon noon zozz kiyo bar kagoon gi nico naana o. Ma anyak eet ci abaca ojece, kinon noon zozz kiyo kabaca ojece naana o.

<sup>30</sup> Zin ma karoonj kobolol, abon bar kabolole kaal o ayelza rongezet onan. <sup>31</sup> Ma Jooi ween baati Manyi ona Yesu Kiristo, aga niini alaj naana kavolonj. Abon bai anyonek noon zany iinya dook noko been neen. <sup>32</sup> Kiyo iiten baal kaave kuture o kazi Damacik e, anyek alaani o alaan o adikir kazi Artas takirnya koot kedeto araane o kaluwa o kutur nice ka ma kakun ka kagamtan. <sup>33</sup> Zin enice aryeyan ol zitat ci adikir, ma itoonekan niigi aneet bitaalin kaluwa nyaati volonj loronta, ma gole nico koroga waanice naana alaane nice.

#### Wunozyak o Pol

**12** <sup>1</sup> Anyan kobolol. Yo nuun akom bololoni gi ci abon agoonekan aneet o, kamena kabolol labak. Inoko kabolole naana wunozyak kibeen kaal o ayelekan Manyi aneet. <sup>2</sup> Baale ooyan Jooi aneet zee been tammu taden ele. Izi inoko irkitowa ci zozz amoto wec. Alaj zin naana kaga ma da koowa tammu tadena didi karabonj kawunoze. Aga Jooi doon. <sup>3</sup> Kazi bodo ne, Ma da koowa tammu tadena didi, karabonj kawunoze kizik kako tammu tadena, alaj naana kaga, bar aga Jooi doon. <sup>4</sup> Zin kaga naana ma waanice kako kaavi tammu tadena e, kazii kaal ci ateeet ol biye zozz ele ci akom eet ci anim koop. Ma alaj aronj Jooi ol kozoozit kaal nicoko. <sup>5</sup> Abon zin waan kabolole naana gi nico, bar zin alaj karoonj kobololi ele can o maany giye nico, dooke coma koca kabolole kaal o ayelza rongezet onan doon. <sup>6</sup> Alaj zin bar karoonj kobolol, bar zin ma kabolol, alaj keen tarbal, eeci kaduwa zozz ceen didi. Alaj zin kabolol o, eeci alaj karoonj ol oogi kabaabanit kizik bar naana kadijdi zozz. Abon olla acin niigi kaal o kagoon naana kibeen zozz o kuuwai naana noogoo.

<sup>7</sup> Anyan Jooi aneet moorizi ci agidan zozz ka calaj kadoj ele kaale o titiny ayelekan niini aneet wunozyai niceke. Ma moorizi nici abil kiyo keet o arukan Loryenti aneet ka kecelbezanan o. <sup>8</sup> Kilalei baale Jook lak iyu dook karoonj kaara mooriz nico nyaatan. <sup>9</sup> Bar anekan ne, “Alaj karuguzin moorize nico. Aleenonu niina ki deten onan. Akom niina gi oma ci aroonj, eeci ma alacai ele, nyaan ayelzai doyizi onane nyaatun kidikir zozz rongezete cun o.” Zin giye nico ma keen rongec, katalne labak, ma kabolole kaal o ayelza rongezet onan ka kicinit ol doyiz o Kiristo nyaatan. <sup>10</sup> Katalne zin naana zozz rongezete onan. Yo nuun amomozan ol aneet giye ci akati Kiristo, katalne naana labak. Ma agidan ol ma apirnanan niigi aneet, katalne buk labak. Eeci ma keen rongec, anyan Kiristo doyiz.

#### Abaaban Pol zozz ci akati ol o tuwento Korintiya

<sup>11</sup> Goon ma kabolol noko, kazooz kiyo eeti o tarbal o. Bar zin igeet neen ci anyan kooz noko o, eeci niiga abon waan azoozan aneeta juruj. Njedet naana alaj kadijdi, bar zin toonnyawa o volonjo goon adinjdiyanu niiga noogoo o alaj ajukan niigi aneet.

<sup>12</sup> Agayu niiga kaal o kagoon naana nyaatunooj zinize ci alal. Ma kaal o ateeet ol biye goon kagoon nyaatunooj o ayelza gi o keene naana toonnyai ceen didi. <sup>13</sup> Kalinjlij baale naana nyaatunooj juruj kiyo goon buk kalinjlij ole o tuwento loocowe ogen o. Olla

zin ɲaan kijinuɲ waanice igeet guruc kiyo iiten baale kajin ɔl o tuwento oogi e. Mayo zin gi nici ɲaatunooɲ gerze? Mā gerze, otonteyan labak.

<sup>14</sup> Baale rak kook kicinuɲ igeet lak ram. Inoko zin karoɔɲ kook kicinuɲ bodo. Akɔm gi ci karoɔɲ kook kijinuɲ kina. Alaɲ karoɔɲ guruc cugooc, bar olla karoɔɲnyuɲ naana igeet ele ka uzuuti zɔzɔ onan. Eeci gɔɔn laadun dɔlya alaɲ azooni baatigeec ki yaatigeec, bar baatigeec ki yaatigeec neen o azooni nɔɔgɔ. <sup>15</sup> Karooɲ zin kook kozolit naana ki igeet kaal ogan kanyei dook ka kitirituɲ igeet. Ma buk katirituɲ igeet alye cano ele. Alaɲ abon ɲaati areezan niiga aneet kidicilim, eeci kareezuɲ naana igeet ɔɔɔt.

<sup>16</sup> Agayu ri niiga ɲaan naana kijinuɲ igeet guruc been neen. Karabɔɲ bar azi ɛeti oman ne, “Alabanet da Pɔl vɔɔɲa.” <sup>17</sup> Alaɲ kalabanuɲ igeet ka kojowa guruc giye ci kitoone ɔl kɔɔɔ ɲaatunooɲ o. <sup>18</sup> Karicanei waanice Titos kook ɲaatunooɲ, ma buk kitoon gɔɔɔna oma ci tuwento korkorit ki nɔɔɔ. Ma Titos ook alabawuɲ? Bar kane, Akɔm! Eeci aneet ki Titos arayinet ageeta dook Vɔɲizi o Joowo, ma kaliɲliɲnya liɲliɲɔn codoi.

<sup>19</sup> Karabɔɲ bar abaabanu niiga aniyu ne, Kanyeka naaga eleeti kobonta ɲaatunooɲ doon. Akɔm kina! Kaduwana naaga kaal nicoko dook ɲume o Joowo eo ɔl o didi oromtozek Kiristo. Laɲotigan o kareezuɲ, ma kaala dook o kagoona naaga, kagoona ka kitirituɲ igeet. <sup>20</sup> Kaɲole naana ɲaati kaka kacinuɲ igeet, ma kajowanuɲ abaaku baayiz ci aɲɔɔwɔ ki o karoɔɲekuɲ naana igeet abaakti. Bodo buk kaɲole ɲaati kakunakuɲ igeet, ma kagernyekuɲ gole calaɲ arooɲnyu niiga. Kaɲole buk ɲaati kamadanuɲ igeet anyaku daɲɔn, ki madkɔn, ki bornet nɔɲ, ki ɲerɔn, ki momoz, ki ɲɔmtiin, ki eleeti doɲiin, been yawyawitin. <sup>21</sup> Kaɲole karabɔɲ tiɲeere aceɓbezanan Jooi aneet ɲaatunooɲ kutulu ɔɔɔt ɲaati kajowane ɔl ci meelik ɲaatunooɲ ɲaan agɔɔn kaalyan ci ger ki waɲzɛt, ma ɲaan kotonɲit kaal ci ger nɔkɔ.

**13** <sup>1</sup> Baale rak koowa ɲaatunooɲ lak ram. Inoko zin tiɲeere ma kakunakuɲ enico, izi koca kuni ci kaku kacinuɲ igeet lak iiyu. Azi waragewi o Joowo ne, “Mā agɔɔn ɛeti gi ci ger, alaɲ akɔlyak nɔɔɔn rooni dooke coma anyak bacok ceen ram karabɔɲ een iiyu ci icinit eet nico ɲaati didi agɔɔne gi nico.” <sup>2</sup> Iiten baal karomen ki igeet e, kitilowa rak ɔl o gɔɔn agɔɔn oɲe ɲaatunooɲ dook ka calaɲ amena niigi oɲene. Bodo zin inoko kiloti ni nɔɔgɔ kedeyai nɔkɔ. Ma kaka tiɲeere ɲaatunooɲ, kaka kagerenyei ɔl dook o agɔɔn kaal o ger baale kibeen buk inoko o. <sup>3</sup> Arooɲnyu niiga agaac karabɔɲ didi kazooz naana zɔzɔ dɔyize o Kiristo abil ɲaatan. ɲaan zin avɔ agayu gi nico iiten ci kakɔye ɲaatunooɲ e, eeci Kiristo o alinliɲ zinzeetine ugoocok alaɲ azeei nɔɔɔn dɔyizi, bar anyak niini dɔyiz ci alinliɲ ɲaatunooɲ ɔɔɔt ele. <sup>4</sup> ɲedet iiten baal adɔdi ɔl nɔɔɔn e alaɲ anyak dɔyiz, bar zin inoko arogi niini dɔyize o Joowo. Mazin buk naaga o koromtozeyi nɔɔɔn, yo nuun akɔmnet dɔyiz, karugna naaga kibeen nɔɔɔn, ma kanyaka dɔyiz o Joowo ka kegernyekuɲ naaga igeet.

<sup>5</sup> Ataɲaamtek zin eleeti cugoocok o maany ka agaac niiga karabɔɲ didi oromtozeyi Kiristo tuwenta, karabɔɲ ɲaane. Mazi anyaktu tuwen, agaac aavi Kiristo tɔ ɲaatunooɲ. <sup>6</sup> Bar kane agayu buk niiga kataɲaamteya naaga eleeti, ma kagaya didi aavi Kiristo tɔ ɲaatinaaɲ o. <sup>7</sup> Kajina zin naaga Jook ka calaɲ agoonu niiga kaal ci ger. Alaɲ zin bar kajina Jook kaal nicoko o ka keyeliztawa gi o karomena naaga ki Kiristo, bar kajina o ka utuguz niiga kaal ci abon, mayo nuun te aɲaamneketu niiga ageeta kizik keegina kaal ci labak. <sup>8</sup> Alaɲ naaga kanimnya kutuguza gi ci aɲɔɔwɔ ki zɔzɔ o Joowo een didi, bar olla naaga karoɔɲnya kuzuuta zɔzɔ onin. <sup>9</sup> Mā akɔmnet ageeta dɔyiz, ma bar adoɲnu niiga, katalnina naaga ɔɔɔt. Ma kajina Jook ka odoyit niiga tuwenta juruɲ. <sup>10</sup> Gi zin ci kayeedekuɲ igeet warage nico ɲaati kadewɔn o neen, ka ma kakunakuɲ ka calaɲ kagerenyekuɲ igeet ɔɔɔt dɔyize o anyan Jooi. Eeci anyan Jooi aneet dɔyiz nico o ka kitirituɲ igeet, alaɲ bar ka kuulaluɲ.

<sup>11</sup> Gɔɔɔnɔga o tuwento, inoko zin kaɲorneke ɲina. Ooritnɔɲ ɔɔɔt ka odoyit tuwenta juruɲ. Iziiyit kaal ci kaduwakuɲ noko juruɲ ka utuguz. Má adaɲonu, bar abaayit juruɲ ganɔnta. Mā agoonu nɔkɔ, aromenu koca didi ki Jook o anyek ɔl reezɔnet ki ganɔn.

<sup>12</sup> Azaayɔ gɔɔn niiga dook reezonte o Joowo. <sup>13</sup> Azaayuy zin buk igeet ɔl o tuwento dook ɲaato.

<sup>14</sup> Abon bai deteni o Manyi ona Yesu Kiristo, ki reezinet o Joowo, been laɲotizet o Vɔɲiz onin aromenu ki igeet dook.